

CONVENIO ENTRE A UNIVERSIDADE DE SANTIAGO DE COMPOSTELA E O INSTITUTO GALEGO DE ESTATÍSTICA PARA A REALIZACIÓN DE ESTADÍAS DE INVESTIGACIÓN PREDOUTORAIS DOS ESTUDANTES DO PROGRAMA DE DOUTORAMENTO EN *XESTIÓN SUSTENTABLE DA TERRA E DO TERRITORIO*

En Santiago de Compostela, a 19 de xullo de 2017

Dunha parte, Don Juan M. Viaño Rey, Reitor da Universidade de Santiago de Compostela (en adiante USC), con enderezo na Praza do Obradoiro, s/n, 15782 Santiago de Compostela, actuando en nome e representación desta, en virtude do Decreto 62/2014 do 28 de maio (DOG 04/06/2014), do seu nomeamento, e polas facultades que se lle atribúen na Lei Orgánica 6/2001 de universidades do 21 de decembro e o Decreto 14/2014 do 30 de xaneiro, polo que se aproban os Estatutos da USC.

E de outra parte, Don José Antonio Campo Andión, Director do Instituto Galego de Estatística (en adiante IGE), con enderezo no Complexo administrativo de San Lázaro, s/n, 15703 Santiago de Compostela, actuando en nome e representación deste, en virtude do Decreto 295/2009, do 14 de maio (DOG 15/05/2009), do seu nomeamento, e polas facultades que se lle atribúen na Lei 9/1988, do 19 de xullo, de estatística de Galicia e no Decreto 60/2016, do 26 de maio, polo que se aproba o Estatuto do IGE.

Ambas as dúas partes se recoñecen mutuamente capacidade xurídica suficiente para subscribir o presente convenio e, a tal efecto,

EXPOÑEN

I. Fins da USC

A USC ten entre os seus fins a creación, desenvolvemento, transmisión e crítica dos coñecementos científico, técnico, artístico e humanístico, de xeito que se potenciará unha educación baseada nos principios democráticos e na defensa da paz e dos dereitos humanos.

II. Fins do IGE

O IGE ten entre os seus fins, de acordo co artigo 7 da lei 15/2016, do 28 de xullo, do Plan galego de estatística 2017-2021, a realización de investigación estatística e a cooperación coa comunidade científica e outras institucións para mellorar métodos e procedementos.

III. Declaración de intencións

Ambas as dúas entidades, considerando que teñen uns obxectivos en parte coincidentes e complementarios, desexan subscribir este convenio co fin de mellorar as súas respectivas misións, para o cal formalizan o presente documento con arranxo ás seguintes

CLÁUSULAS

PRIMEIRA. OBXECTO DO CONVENIO

É obxecto deste convenio regular as condicións nas que os/as estudantes do programa de doutoramento en *Xestión Sustentable da Terra e do Territorio* da USC (en adiante os/as doutorandos/as) realizarán estadías de investigación predoutorais no IGE.

SEGUNDA. DESTINATARIOS E RÉXIME XURÍDICO

A. DESTINATARIOS

Os/as doutorandos/as da USC poderán realizar durante o período dos seus estudos e logo de ser autorizados pola Comisión Académica do Programa de Doutoramento (en adiante CAPD), estadias de investigación predoutorais no IGE, coa finalidade de efectuar actividades formativas planificadas e desenvolver a súa tese de doutoramento. Ditas estadias figurarán no Plan de Investigación e, ao seu remate, os/as doutorandos/as deberán acreditarlas no Documento de Actividades.

Os períodos e horarios de realización das estadias estableceranse de acordo coas características destas e as dispoñibilidades do IGE. O cómputo da estadia suspenderase en casos de enfermidade, maternidade, por un deber inescusable de carácter cívico, ou por calquera causa legal que estableza o ordenamento xurídico.

Os/as doutorandos/as incorporaranse ao IGE na data acordada, estarán suxeitos/as ao horario que se estableza, cumprirán as normas de réxime interno do IGE, seguirán as instrucións que reciban das persoas responsable do mesmo e respectarán as normas de funcionamento, seguridade e prevención de riscos laborais do IGE.

Os/as doutorandos/as aplicaranse con dilixencia ás tarefas que se lles encomenden, das que gardarán segredo profesional durante a súa estadia e logo de rematar esta. A tales efectos, asinarán un compromiso de boas prácticas, confidencialidade e cumprimento do segredo estatístico, segundo o modelo que estableza o IGE.

En todo caso, tanto nas publicacións como nas patentes que se orixinen, figurarán a afiliación á USC dos/as doutorandos/as e a colaboración do IGE.

Os/as doutorandos/as non poderán realizar estadias de investigación no IGE se previamente mantiveron unha relación laboral con el.

B. RÉXIME XURÍDICO

A participación do IGE nas estadias de investigación dos/as doutorandos/as non supón a adquisición de máis compromisos que os estipulados no presente convenio e, en ningún caso, se derivarán obrigas propias dun contrato laboral. Por non ser unha relación de carácter laboral, no caso de que o/a doutorando/a se incorpore ao cadro de persoal do IGE, o tempo de estadia non se computará aos efectos de antigüidade.

Os/as doutorandos/as que realicen estadias terán unha relación co IGE exclusivamente formativa, sen que se deriven dela vínculo xurídico algún, relación laboral, ou compromiso distinto aos estipulados no presente convenio.

Durante o período de realización das estadias, os/as doutorandos/as estarán cubertos/as, en caso de accidente, enfermidade ou infortunio familiar polo Seguro Escolar ou o Seguro Obrigatorio, nos termos e condicións que establece a lexislación vixente. Ademais, queda garantida a responsabilidade civil dos danos a terceiros que poida ocasionar o/a doutorando/a pola póliza que a USC ten subscrita a tales efectos.

TERCEIRA. ACTUACIÓNS DA USC

A USC, a través da CAPD, tomará baixo a súa responsabilidade e ao seu cargo as seguintes actuacións:

- 1) Autorizar a realización das estadias de investigación.

- 2) Formalizar para cada doutorando/a, con carácter previo ao inicio da estadía, unha ficha, cuxo modelo se xunta como anexo ao convenio.
- 3) Comunicar e enviar ao IGE toda a información e documentación que sexa necesaria para realizar as estadias de investigación.

CUARTA. ACTUACIÓNS DO IGE

O IGE tomará baixo a súa responsabilidade e ao seu cargo as seguintes actuacións:

- 1) Nomear, de acordo coa CAPD, unha persoa titora coa titulación de doutor/ra, que se responsabilizará da formación de cada doutorando/a e da valoración da súa estadía.
- 2) Velar para que as instalacións onde se desenvolvan as estadias posúan os medios materiais e servizos que permitan garantir a realización das actividades formativas planificadas polo IGE no desenvolvemento da tese de doutoramento, observando os criterios de accesibilidade universal e deseño para todos, de igualdade de oportunidades, de non discriminación e de accesibilidade universal das persoas con discapacidade.
- 3) Observar e facer observar as medidas de seguridade e hixiene establecidas no centro e informar, formar e facer cumprir e respectar aos/as doutorandos/as ditas medidas.
- 4) Expedir logo de finalizar a estadía unha certificación a favor dos/as doutorandos/as, na que se fará constar o período da estadía realizado, as horas totais e un resumo das actividades abordadas. Previamente o/a doutorando/a elaborará unha memoria final sobre as tarefas realizadas e os resultados obtidos.

QUINTA. RÉXIME ECONÓMICO

O presente convenio non implica incremento do gasto público e non suporá contraprestacións económicas para ningunha das partes, resultando así un custe cero para cada unha delas.

SEXTA. COMISIÓN DE SEGUIMIENTO

Aos efectos estritos do cumprimento dos obxectivos e obrigas descritos neste convenio, así como para resolver as diverxencias que puideran xurdir entre as partes respecto da súa interpretación e cumprimento, constituirase unha comisión paritaria de seguimento, integrada por catro membros, dous pola USC e dous polo IGE.

Por parte da USC, os dous membros serán a persoa titular da Dirección da Escola de Doutoramento e o/a coordinador/a do programa de doutoramento en *Xestión Sustentable da Terra e do Territorio*. Por parte do IGE serán as persoas titulares da Secretaría Xeral e da Subdirección de Síntese, Análise e Difusión. A comisión de seguimento reunirse cando o solicite algunha das dúas partes.

SÉTIMA. PROTECCIÓN DE DATOS

De conformidade coa lexislación sobre protección de datos de carácter persoal e segredo estatístico, o/a doutorando/a que, por razón das actividades formativas e/ou investigadoras, teña acceso en calquera fase da estadía a datos de carácter persoal, ou dos que deba manter segredo, non revelará a ningunha persoa allea información da que tivera coñecemento, nin utilizará ou disporá dela dunha maneira ou cunha finalidade distinta á esixida polas accións formativas e/ou investigadoras, deber que subsistirá aínda logo de rematadas estas.

OITAVA. COMEZO E DURACIÓN

A duración do presente convenio será de catro anos e producirá efectos dende a súa sinatura, podéndose prorrogar mediante addenda por un único período igual, agás denuncia expresa

dalgũa das partes, comunicada cun mes de antelación ao remate da súa vixencia. A finalización do convenio non afectará ás estadías iniciadas durante a súa vixencia e pendentes de rematar, para as que seguirán vixentes os dereitos e obrigas do mesmo.

NOVENA. DENUNCIA

Calquera das partes poderá denunciar o comunicándoo á outra por escrito, cun un mes de antelación á data na que se desexe o remate deste ou, no seu caso, da súa prórroga.

DÉCIMA. CUESTIÓNS LITIXIOSAS

As discrepancias xurdidas sobre interpretación, desenvolvemento, modificación, resolución ou efectos que se puideran derivar da aplicación do convenio, poderán solucionarse na comisión de seguimento, por acordo das partes. De non se chegar a un acordo, as cuestións litixiosas serán de coñecemento e competencia da orde xurisdiccional contencioso-administrativa que corresponda.

E, en proba de conformidade e para a debida constancia do acordado, ambas partes asinan o presente convenio en exemplar duplicado, en todas as súas follas e no lugar e data indicados.

**POLA UNIVERSIDADE DE SANTIAGO
DE COMPOSTELA**

O Reitor
Juan M. Viaño Rey

**POLO INSTITUTO GALEGO DE
ESTADÍSTICA**

O Director
José Antonio Campo Andión

ANEXO

FICHA DE ESTADÍA DE INVESTIGACIÓN PREDOUTORAL

Nome completo do doutorando ou doutoranda:

DNI/Pasaporte:

Programa de doutoramento no que está matriculado/a: *Xestión Sustentable da Terra e do Territorio*

Curso académico 1ª inscrición doutorando/a:

Título do Plan de Investigación:

Director ou directora de tese:

Resumo da tese:

Obxectivos a conseguir durante a estadía no IGE e información estatística que se precisa:

Formación estatística e informática do/a doutorando/a:

Data inicio estadía:

Data final estadía:

Lugar na que realizará a estadía:

Titor ou titora asignado polo IGE:

En _____, a _____

O/A doutorando/a

Pola Universidade de Santiago de Compostela

O/A coordinador/a do programa de doutoramento

Polo IGE

O/A titor/a
